



Rimnada sistemica da dretg communal dalla vischnaunca da Sagogn

Numera 2100.01.01

Tetel Uorden disciplinar scola Sagogn

Ediziun Ediziun dils 17-09-2020

Remplazza igl uorden dils 01-08-2005

Remplazza igl uorden dils 04-01-1997

Remplazza igl uorden dils 05-10-1979

**Entrada en
vigur** 01-10-2020

Cuntegn

I. Disposiziuns generalas	3
II. Reglas da cumpurtament	3
III. Cumpetenzas, castitgs disciplinars, proceder	5
IV. Disposiziuns finalas e transitorias	6

Sebasond sin art. 13 dalla lescha da scola dalla vischnaunca da Sagogn e sin art. 50 dalla lescha davart las scolas popularas dil cantun Grischun relai il cussegl da scola quest uorden disciplinar.

Las denominaziuns scolaras resp. scolars e scola cumpeglian ils affons da scoletta e la scoletta, schinavon ch'ei dat buca disposiziuns cuncontrastontas.

I. Disposiziuns generalas

Intent

Art. 1

¹ Igl uorden disciplinar gida ensemen cun la lescha da scola ed igl uorden da casa dalla vischnaunca da Sagogn ad ademplier igl intent dalla scola tenor art. 2 dalla lescha davart las scolas popularas dil cantun Grischun.

² El reglescha ils dretgs e las obligaziuns dallas scolaras e dils scolars tenor art. 53-55 dalla lescha da scola cantunala e sustegn las personas d'instrucziun da cumplenir lur obligaziuns tenor art. 59 dalla lescha da scola cantunala sco era da garantir in menaschi da scola ordinau ed efficient.

³ Plinavon reglescha el las competenzas dallas autoritads da scola, dalla direcziun da scola e dallas personas d'instrucziun sco era il proceder en cass che scolars cunterfan alla disciplina da scola.

Camp
d'applicaziun

Art. 2

¹ Igl uorden disciplinar vala per tut las scolaras e tut ils scolars dalla scola publica dalla vischnaunca da Sagogn.

² Scolaras e scolars d'ordeifer suttastattan medemamein allas disposiziuns da quest uorden disciplinar, schinavon ch'els passentan il temps per motivs da scola sin igl areal dalla scola da Sagogn.

II. Reglas da cumpurtament

Disciplina da
scola

Art. 3

¹ Las scolaras ed ils scolars secumportan duront l'instrucziun e sin il viadi a scola adina bein. Els ein gentils e tolerant. Els vegnan a scola fleghegiai e vestgi correctamein.

² Da principi van els a scola a pei. Sin fundament d'ina damonda giustificada sa il cussegl da scola lubir excepziuns. Per il viadi a scola han ils geniturs l'obligaziun da tgira.

³ Las scolaras ed ils scolars risguardan las disposiziuns da

quest uorden disciplinar e suondan immediat las instrucziuns da scolastas e scolasts, dallas autoritads da scola e dad autras persunas employadas dalla vischnaunca da Sagogn.

⁴ Ils temps d'instrucziun ston vegnir risguardai. Ins astga bandunar igl areal da scola durant pausa mo cun la lubientscha explicita dalla scolasta resp. dil scolast da classa.

⁵ Las scolaras ed ils scolars tralaschan tut las activitads che disturban il menaschi da scola.

⁶ Objects prigulus (cuntials ni autras armas) ein scumandai ton en casa da scola sco era sin igl entir areal da scola incl. la halla polivalenta. Las persunas d'instrucziun san lubir excepziuns per incumbensas specificas (per exempel per excursiuns, camps, dis da project, etc.).

⁷ Durant il temps da scola astgan ins buca carrar sin igl areal da scola.

Localitads,
indrezs, urdeins

Art. 4

¹ Ils uordens da casa dalla vischnaunca da Sagogn che concernan il complex da scola e la halla polivalenta ston vegnir risguardai.

² Las scolaras ed ils scolars ston haver quitau dils indrezs dil complex da scola e dalla halla polivalenta, dil mobiliar e dils apparats (electronics) sco era dil material da scola. Sche enzatgei vegn donnegiau cun nauscha intenziun, stattan buns ils geniturs ni ils responsabels per l'educaziun.

³ Las scolaras ed ils scolars astgan buca duvrar apparats electronics privats (smartphones, smartwatches, etc.) durant l'instrucziun en casa da scola da Sagogn ed en general independentamein dil liug. Sche enzatgei risguarda buca quella regla, san las persunas d'instrucziun confiscar ils apparats e returnar els als responsabels per l'educaziun tenor curvegna. Las persunas d'instrucziun san lubir l'utilisaziun per incumbensas specificas limitadas temporalmein.

⁴ Da principi astgan las scolaras ed ils scolars far pensums da casa cun igl iPad dalla scola. Quei denton sulettamein cun la lubientscha ed igl avis (reglas da diever enconuschentas als affons) dalla persuna d'instrucziun. Ils affons ston haver quitau digl apparat e mo els astgan duvrar el a casa per far ils pensums da scola ni per emprender a distanza. Sch'igl iPad vegn donnegiaus a casa, sto quei vegnir annunziiau alla persuna d'instrucziun. En quei cass ston ils geniturs

surprender ils cuosts per ils donns caschunai che resultan dalla reparatura ni dil remplazzament digl apparat.

⁵ Igl ei scumandau explicitamein da derasar cuntegns electronics illegals. Surpassaments vegnan annunziai.

Drogas

Art. 5

¹ Igl ei scumandau sin igl entir areal da scola da consumar drogas da tut gener (fimar, trer tubac, e-cigarettas) sco era da beiber bubrondas alcoholicas duront il temps d'instrucziun e duront occurrenzas da scola.

III. Cumpetenzas, castitgs disciplinars, proceder

Castitgs disciplinars

Art. 6

¹ Surpassaments dalla lescha da scola, digl uorden disciplinar e digl uorden da casa san haver per consequenza ina reprimanda ed igl ei pusseivel ch'ils responsabels per l'educaziun vegnan informai.

² Las scolaras ed ils scolars san vegnir castigai cun incumbensas specialas.

Cumpetenzas

Art. 7

¹ Las personas d'instrucziun san disponer ina reprimanda en scret ni a bucca, incumbensas specialas ni in arrest tochen in mezz di.

² La direcziun da scola sa castigiar ina scolara ni in scolar cun incumbensas specialas duront maximalmein quater mezz dis.

³ Tenor las directivas concernent absenzas, congedi e dispensaziun dall'instrucziun dil cantun Grischun sa il cusseg da scola pretender digl inspectorat da scola d'exclauder scolaras e scolars dall'instrucziun.

Fatgs, udida giuridica

Art. 8

¹ Il gener e las circumstanzas dil surpassament disciplinar ston vegnir scleri. Ins sto conceder l'udida giuridica alla scolara ni al scolar.

² Sch'il castitg ordinau cuoza dapli che dus mezz dis, ston ils representants legals vegnir tedlai avon che prender la decisiun definitiva.

³ Sin damonda ston ins emetter ina decisiun, encunter la quala ins sa recuorer.

Recuors

Art. 9

¹ Encunter decisiuns da castitgs disciplinars d'ina persuna d'instrucziun san ins far recuors enteifer 10 dis da lavur tier la direcziun da scola.

² Encunter decisiuns da castitgs disciplinars dalla direcziun da scola san ins far recuors enteifer 10 dis tier il cussegl da scola.

³ Encunter decisiuns da castitgs disciplinars dil cussegl da scola san ins far recuors enteifer 10 dis tier il Departament d'educaziun, cultura e protecziun digl ambient dil Grischn.

Execuziun

Art. 10

¹ Las persunas d'instrucziun ein responsablas per l'execuziun dil castitg disciplinar ch'ellas han ordinau. Ellas san surdar l'execuziun ad in'otra persuna d'instrucziun ni a tiazs.

Annunzia

Art. 11

¹ Il cussegl da scola, la direcziun da scola e las persunas d'instrucziun han il dretg, e tut tenor la grevezia dil cass l'obligaziun, d'annunziar il cass alla polizia ni d'informar las autoritads da protecziun d'affons e da carschi.

IV. Disposiziuns finalas e transitorias

Art. 12

¹ Quei uorden disciplinar entra en vigor igl 1. d'october 2020. El remplazza igl uorden disciplinar dalla vischnaunca da Sagogn digl 1. d'uost 2005.

Ediu dil	cussegl da scola	ils	17-09-2020
Approbau dil	cussegl da scola	ils	17-09-2020
Publicaziun officiala dalla vischnaunca da Sagogn.			